

**PETICIJA ZA PREIMENOVANJE
DŽAMIJE U VIŠEGRADU
U KOJOJ JE SLUŽIO
SAFET EF. KARAMAN
IZ
CAREVA DŽAMIJA
U
DŽAMIJA ŠEHIDA SAFET EF. KARAMANA**

Bismi'lláh

Poštovani,

Nakon rata nametnutog nezavisnoj državi Bosni i Hercegovini 1992 godine, pa sve do današnjega dana, i sutrašnjeg, i preksutrašnjeg..., muslimani ovog prelijepog balkanskog podneblja usred Europe ne mogu više izdvojiti ni jedan dan koji bi bio nazvan najgorim, ili najbolnijim, ili najtragičnijim... Gotovo da nema časa kada se ne otkrivaju nove masovne grobnice, ili se ne klanjaju masovne dženaze žrtvama pokoljâ koje je sudbina, samo Bogu svojstvenom alkemijom, preobrazila u najmoćnije i najslavnije borce za slobodu. Čak iako većina ubijenih nikada nije držala u rukama nijedno ubojito oružje; čak i kada su u pitanju onemoćali starci; čak i kad je riječ o ženama, al' i djevojčicama, silovanim pa onda ubijanim, prije no što su i stasale da i same postanu nećije supruge i majke; čak i kad je u nasilnoj smrti, ko na koncert Životu, skupljena sva mladost jednog grada, sva njegova djeca; čak i kad su dojenčad otrgnuta s majčinskih grudi... da ih sve, mrtve, poje vode Drine, u koju su bačena njihova iznakažena tijela...

... a sve to u pomamnom hodu kroz Bosnu hordi koje su htjele zbrisat sa lica ove prelijepje zemlje jednu vjeru; i bijele puti. Pa onda i njene bogomolje, i njenu bosansku domaju, njen bh. najuži zavičaj.

Kraljevi, i carevi, i predsjednici, i političari kalibra prethodnih, nisu ništa, ili sasma su malo učinili da spriječe zločine. Zato, lijepo od njih što se nisu pojavili u Višegradu 26.05.2012, na masovnoj dženazi muslimanima ovoga grada, exhumiranim sa dna njihove Drine, ne jednom u povijesti bojenom krvlju onih koji su se nastanjivali na njenim obalama, povezujući se mostovima, i vjerom u ljudskost.

Ali je Sudbina ovaj put i samoj rijeci priredila iznenađenje. Preoblikovana i preimenovana u svom toku ispod Višegrada u Jezero Perućac, mislili su, Drina više neće znati da priča. Ali je progovorila više nego ikad prije. Trebalo je samo nakratko zaustaviti mehanizam tehnike i zaborava, pa da Drina ispriča kako je postala bešikom za poubijanu višegradsku nejač, a za odrasle, mjestom za stanku na putu u vječni počinak. Ona će, ako ne o svima, ispričati svijetu priču bar o šezdedest i šest njih ubijenih u lukićevskim orgijama, od kojih dvadesetidvije priče o djeci kojima je bila, sve ove godine, i mati, i kolijevka.

Među ekshumiranim, otrgnutim od Brane (zaborava) bili su i posmrtni ostaci časnog džamijskog imama iz Višegrada, šehida Safet ef. Karamana, u povodu kojeg i šaljemo ovu

PETICIJU ZA PREIMENOVANJE DŽAMIJE U VIŠEGRADU
U KOJOJ JE SLUŽIO
IZ
CAREVA DŽAMIJA
U
DŽAMIJA ŠEHIDA SAFET EF. KARAMANA

30. 05. – 11. 06. 2012.

P O T P I S N I C I : Kopije oko 2.500 potpisa iz Sarajeva (uključujući Višegradane sa sadašnjim mjestom boravka u Sarajevu), Sanskog Mosta, Bihaća, Mostara, Podveleža, Blagaja, Konjica...)